

**Acta da sesión ordinaria da Xunta de Goberno
correspondente ao día 5 de febreiro de 2024**

Con data cinco de febreiro do ano dous mil vinte e catro, ás nove horas e corenta e cinco minutos, réunese a Xunta de Goberno da Deputación na Sala de Xuntas do Pazo Provincial, co fin de realizar sesión ordinaria en primeira convocatoria e tratar nela os asuntos que figuraban na orde do día, coa asistencia dos seguintes deputados e deputadas:

Presidente:

D. Luís Menor Pérez

Deputados/as:

D.^a Marta Novoa Iglesias

D. Plácido Álvarez Dobaño

D. Rosendo Luis Fernández Fernández

D. Jorge Pumar Tesouro

D.^a Ana Patricia Torres Madureira

D.^a Teresa Barge Bello

D. César Manuel Fernández Gil

D. Manuel Seoane Rodríguez

Secretario:

D. Adamantino Barreiro García

Interventora:

D.^a María Begoña Álvarez Matos

A continuación iníciase o tratamento dos asuntos incluídos na orde do día, do modo que se reflicte a continuación:

1.- APROBACIÓN DA ACTA DA SESIÓN ANTERIOR CORRESPONDENTE Á ORDINARIA DO DÍA 29 DE XANEIRO DE 2024.- A Secretaría Xeral deu traslado do borrador da acta anterior, correspondente á ordinaria do día 29 de xaneiro de 2024.

Non se producen intervencións, polo que a **Xunta de Goberno**, por unanimidade, **adopta** o seguinte **acordo**:

- Aprobar a acta da sesión ordinaria do día 29 de xaneiro de 2024, conforme co borrador elaborado pola Secretaría Xeral.

2.- APROBACIÓN DAS BASES REGULADORAS E CONVOCATORIA DA I EDICIÓN DO CONCURSO “A DEPUTACIÓN ESCOITA”, PROMOVIDO POLA DEPUTACIÓN DE OURENSE.

- De conformidade coa proposta favorable da Presidencia, a Xunta de Goberno, por unanimidade, adoptou o seguinte acordo:

1º.- Aprobar as bases e a convocatoria da I edición do concurso “A Deputación ESCOITA”, correspondente á anualidade 2024, con suxeición ás seguintes cláusulas:

Primeira. Obxecto:

Constitúe o obxecto destas bases a regulación da convocatoria e procedemento para a resolución do concurso “A Deputación ESCOITA” e a concesión dos premios que se prevén, todo isto no ámbito do proxecto ESCOITA promovido por esta Corporación Provincial e correspondente á anualidade de 2024.

Segunda. Participantes:

Poderán participar neste concurso os estudantes dos centros educativos da provincia de Ourense, que cursan en 2023-2024, o curso de segundo de bacharelato en calquera das súas modalidades.

Terceira. Modalidades do concurso:

1.- “Mozos/as emprendedores/as”: *Nesta modalidade a mocidade participante deberá presentar un deseño dun logo para o proxecto “A Deputación ESCOITA” e destinado a ser a imaxe corporativa deste proxecto promovido pola Administración provincial. Cada participante poderá presentar unha única proposta nesta modalidade, que deberá ser un elemento gráfico, orixinal e inédito, que identifique e garde relación co Proxecto “A Deputación ESCOITA”. Este logotipo poderá ser presentado tanto en color como en branco e negro, e preferiblemente en formato .jpg*

2.- “Un futuro para Ourense”: *Nesta modalidade a mocidade participante deberá presentar un documento de propostas, demandas ou iniciativas que melloren a nosa provincia e as condicións de vida da mocidade, e que fomenten a súa permanencia no noso territorio, tanto para aqueles que desexen cursar estudos superiores como para aqueles que pretenden a súa incorporación ao mercado laboral.*

O documento deberá ser presentado en formato de calquera procesador de textos que permita a súa visualización nun entorno de Windows, e nel poden incluírse imaxes, gráficos

ou outros elementos que enriquezan a proposta. Establécese un espazo máximo de cinco (5) follas.

Cuarta. Normas de entrega dos traballos:

Os traballos poderán ser presentados polo alumnado ou polos seus representantes legais, ou de forma colectiva polos responsables dos centros docentes. Os lugares de presentación serán os previstos no artigo 16.4 da Lei 39/2015, do 1 de outubro, do procedemento administrativo común das administracións públicas, así como no Rexistro Xeral da Deputación Provincial.

*A solicitude de participación, segundo modelo normalizado (**Anexo I** para solicitudes individuais e **Anexo II** para solicitudes colectivas), debe acompañar de forma preceptiva aos traballos que se presenten.*

O prazo de presentación establécese desde o día seguinte á publicación do anuncio da convocatoria no BOP de Ourense ata o 30 de abril de 2024.

Quinta. Xurado do concurso:

O xurado encargado de cualificar os traballos presentados estará conformado como segue:

- Presidente: o deputado delegado na Área de Cultura, Educación e Deporte, César Manuel Fernández Gil.*
- Vogais: a deputada delegada en materia de Igualdade e Mocidade dona Teresa Barge Bello, e empregado público da DPO (axudante de deseño) Jesús Castrillo Morán, e a asesora da Presidencia dona Montserrat Lama Nóvoa.*
- Secretario: o asesor da Presidencia don Aurelio Gómez Villar, con voz pero sen voto e coas atribucións propias dun secretario de actas.*

Os titulares, se por algunha circunstancia o consideran necesario, poderán delegar as súas funcións nas persoas que estimen oportunas.

O xurado resolverá o concurso por maioría simple, facultándose para a interpretación das presentes bases en caso de que xurdiran dúbidas sobre a súa aplicación. O ditame do xurado, que será inapelable, farase público no mes de maio de 2024.

Para cualificar os traballos, o xurado terá en conta, entre outros, os seguintes criterios:

- a.- Que o traballo presentado se axuste á temática do concurso.*
- b.- A corrección ortográfica.*
- c.- A orixinalidade e creatividade do traballo.*
- d.- A idoneidade da proposta para o proxecto “A Deputación Escoita”.*

Sexta. Premios:

Na modalidade de “Mozos/as emprendedores/as”, o xurado seleccionará ás cinco (5) mellores propostas, que serán premiadas con dúas entradas para cada un dos cinco autores/as seleccionados para o concerto do artista Ed Sheran programado para a data 06.07.2024 no Monte do Gozo de Santiago de Compostela.

Na modalidade “Un futuro para Ourense”, o xurado seleccionará ás cinco (5) mellores propostas, que serán premiadas con dúas entradas para cada un dos cinco autores/as seleccionados para o Festival “O Son do Camiño” programado para as datas 30.05.2024, 31.05.2024 e 01.06.2024 no Monte do Gozo de Santiago de Compostela.

Os premios serán achegados pola Xunta de Galicia, que colabora con este concurso da Deputación Provincial de Ourense.

Sétima. Normativa:

A participación neste concurso leva implícito por parte dos participantes a cesión á Deputación de Ourense dos dereitos de reprodución, edición e comunicación dos traballos presentados, sempre que esta se realice con carácter gratuíto.

Da mesma maneira, enténdese o consentimento por parte dos participantes para que a Deputación de Ourense e a Xunta de Galicia poidan facer públicas imaxes e a identidade dos participantes e gañadores nas diferentes actividades englobadas no contexto do propio concurso.

Os datos persoais achegados coas solicitudes incorporaranse ás correspondentes actividades de tratamento da Deputación Provincial de Ourense e serán tratados coa/s finalidade/s específicas de cada tratamento, de conformidade coa regulación establecida no Regulamento xeral de protección de datos (Regulamento UE 2016/679 do Parlamento e do Consello) e na Lei orgánica 3/2018, de protección de datos persoais e garantía dos dereitos dixitais.

A lexitimación do tratamento baséase no cumprimento dunha obrigaón legal e/ou no cumprimento dunha misión realizada en interese público ou no exercicio de poderes públicos conferidos a este responsable, para levar a cabo as súas competencias, e/ou calquera outra inherente ao presente concurso.

O prazo de conservación dos datos será o legalmente previsto.

Os datos persoais poderán serlle cedidos á Xunta de Galicia e unicamente serán obxecto doutras cesións, se é o caso, tralo consentimento previo ou de acordo co previsto na lexislación antedita.

As persoas interesadas poderán exercer os deus dereitos de acceso, rectificación, supresión, oposición, limitación do tratamento e portabilidade, así como opoñerse á toma de decisións individuais automatizadas, diante do responsable do tratamento, que é a Deputación Provincial de Ourense, ou ante o seu delegado de Protección de Datos, no correo electrónico dpd@depourense.es. En todo caso, os interesados poderán formular as reclamacións que consideren oportunas en relación co tratamento dos seus datos persoais ante a Axencia Española de Protección de Datos.

2º.- Publicar este acordo no BOP e na sede electrónica da Deputación Provincial, para coñecemento e efectos oportunos.

3.- APROBACIÓN DAS BASES REGULADORAS E CONVOCATORIA DA XI EDICIÓN DO PREMIO “ESTATUTO DE AUTONOMÍA DE GALICIA DE DEBUXO E REDACCIÓN ESCOLAR”.- De conformidade coa proposta favorable da Presidencia, a Xunta de Goberno, por unanimidade, adoptou o seguinte acordo:

1º.- Aprobar as bases e a convocatoria da XI edición do Premio Estatuto de Autonomía de Galicia de debuxo e redacción escolar, correspondente á anualidade 2024, con suxeición ás seguintes cláusulas:

A. Obxecto:

Constitúe o obxecto destas bases a regulación da convocatoria e procedemento para a concesión do XI Premio Estatuto de Autonomía para Galicia de debuxo e redacción escolar, correspondente á anualidade 2024.

O lema desta décima edición do concurso é “**A defensa e promoción dos valores culturais do pobo galego**”.

B. Participantes:

Poderán participar neste concurso os estudantes dos niveis educativos de Infantil, Primaria, Educación Especial, Ensino Secundario Obrigatorio, Bacharelato e Ciclo Medio de Formación Profesional, de centros de ensino xeral tanto públicos como concertados ou privados, da provincia de Ourense.

Os alumnos dos niveis educativos citados realizarán os seus traballos de xeito individual.

C. Modalidades:

1.- Os alumnos de Educación Infantil e Primaria, así como os de Educación Especial, presentarán un debuxo ou traballo artístico que deberá facer referencia ao lema do concurso.

Será presentado nun folio ou cartolina en branco, tamaño A4, non terá relevos e a técnica a empregar será libre.

2.- Os alumnos de Ensino Obrigatorio, Bacharelato e Ciclo Medio de Formación Profesional, deberán presentar unha redacción sobre o Estatuto de Autonomía, cunha extensión mínima de sete folios e máxima de doce, escrita en galego, a man ou en ordenador, por unha soa cara e a dobre espazo.

Se o traballo se fai en ordenador, o tipo e tamaño de letra será Arial 12. O traballo literario poderá ser ampliado ou complementado con fotografías, recortes de prensa, etcétera.

Os traballos poderán presentarse en papel ou en soporte electrónico cunha tecnoloxía que permita a súa visualización nun entorno Windows. O autor poderá entregar un CD/DVD coas aplicacións reinstaladas que permitan a visualización sen ningún tipo de instalación en disco.

D. Normas de entrega dos traballos:

Os traballos poderán ser presentados polos alumnos ou os seus representantes legais, empregando o modelo anexo I, ou de forma colectiva polos responsables dos centros docentes, empregando o modelo anexo II. Os traballos poderán presentarse en calquera dos lugares previstos no artigo 16.4 da Lei 39/2015, do 1 de outubro, do procedemento administrativo común das administracións públicas, así como no Rexistro Xeral da Deputación Provincial, que mantén a súa operatividade ao abeiro do establecido na Disposición final 7ª da devandita Lei 39/2015, ata as 14.00 horas do día 22 de marzo de 2024.

Segundo o nivel educativo ao que pertencen os concursantes, terase en conta o seguinte:

1.- Alumnos de educación infantil, primaria e educación especial:

Figurará no reverso do traballo o nome do estudante, idade, enderezo, teléfono fixo ou móbil, colexio e curso.

2.- Alumnos de ensino secundario obrigatorio, bacharelato e ciclo medio de formación profesional.

Figurarán nun folio separado do traballo, os datos do autor, nome, idade, enderezo, teléfono fixo ou, colexio e curso.

Se o soporte fose electrónico, estes datos deberán figurar nun folio ou etiqueta que non vaia pegada ao CD/DVD.

E. Xurado do concurso:

O xurado encargado de cualificar os traballos presentados estará conformado como segue:

- Presidente: o presidente da Deputación de Ourense.
- Vicepresidente: o deputado da Área de Cultura.
- Vogais: un representante de cada un dos grupos políticos con representación no Pleno da Deputación, designado por estes.
- Secretario: o asesor de Política Cultural, con voz pero sen voto e coas atribucións propias dun secretario de actas.

Os titulares, se por algunha circunstancia o consideran necesario, poderán delegar as súas funcións nas persoas que estimen oportunas.

O Xurado resolverá o concurso por maioría simple, facultándose para a interpretación das presentes bases en caso de que xurdiran dúbidas sobre a súa aplicación. O ditame do xurado, que será inapelable.

F. Criterios de selección dos traballos:

Para cualificar os traballos, o xurado terá en conta, entre outros, os seguintes criterios:

- a.- Que o traballo presentado se axuste ao tema do concurso.
- b.- A corrección ortográfica.
- c.- A limpeza e coidado na súa presentación.
- d.- A orixinalidade e creatividade do traballo.

G. Premios:

Na modalidade de debuxo, o xurado seleccionara os 20 mellores debuxos, tendo en conta cada un dos niveis educativos, así como os diferentes cursos e idades dos participantes, que serán premiados cun diploma e un lote de libros.

Na modalidade de redacción, o xurado seleccionará os 20 mellores traballos, tendo en conta os niveis educativos, cursos e idades dos participantes, que serán premiados cun diploma, un lote de libros e unha viaxe a Santiago de Compostela para visitar o Parlamento de Galicia, e realizar algunha outra actividade cultural.

H. Entrega de premios:

Os premios serán entregados no transcurso dun acto institucional, presidido polo presidente da Deputación, que terá lugar entorno, o día 06 de abril de 2024, para conmemorar o día do Estatuto de Autonomía de Galicia.

I. Disposición derradeira:

A participación neste concurso leva implícito por parte dos participantes a cesión a Deputación de Ourense dos dereitos de reprodución, edición e comunicación dos traballos presentados, sempre que esta se realice con carácter gratuíto.

Da mesma maneira, entendese o consentimento por parte dos participantes, para que a Deputación de Ourense e o Parlamento de Galicia podan publicar imaxes dos alumnos gañadores nas diferentes actividades englobadas no contexto do propio concurso.

2º.- Publicar este acordo no BOP e na sede electrónica da Deputación Provincial, para coñecemento e efectos oportunos.

4.- APROBACIÓN DAS BASES E CONVOCATORIA DA VII EDICIÓN DO PREMIO RODOLFO PRADA Á XESTIÓN CULTURAL 2024.- De conformidade coa proposta favorable da Presidencia, a Xunta de Goberno, por unanimidade, adoptou o seguinte acordo:

1º.- Aprobar as bases e a convocatoria do Premio Rodolfo Prada á xestión cultural, na súa sétima edición, dirixido a persoas, tanto profesionais como afeccionadas, proxectos ou colectivos, que se signifiquen pola xestión de iniciativas de carácter cultural e que desenvolvan a súa actividade na Comunidade Autónoma Galega ou fóra de Galicia, pero con claras referencias nos seus contidos e obxectivos á cultura galega, nos seguintes termos:

Artigo 1) Convocatoria

Convócase o “ VII Premio Rodolfo Prada á xestión cultural 2024” ,na sétima edición, dirixido a persoas, tanto profesionais como afeccionadas, proxectos ou colectivos, que se signifiquen pola xestión de iniciativas de carácter cultural e que desenvolvan a súa actividade na Comunidade Autónoma Galega ou fóra de Galicia, pero con claras referencias nos seus contidos e obxectivos á cultura galega.

Enténdese que o contexto cultural no que se convoca este premio son aquelas iniciativas que teñen cabida dentro dalgunha das modalidades que se relacionan tradicionalmente no marco xenérico da cultura e, por extensión, de actualidade e de perspectivas de futuro, no novo concepto das industrias culturais e creativas:

- Artes Escénicas
- Artes Plásticas
- Audiovisual
- Etnografía
- Letras

- Música
- Patrimonio Histórico e Cultural
- Industrias culturais e creativas
- Proxección exterior da cultura galega

Artigo 2) Obxecto e contido dos premios

Concederanse tres categorías de premios:

Colaboración directa da Deputación Provincial de Ourense co proxecto cultural que promovan as persoas físicas, tanto profesionais como voluntarias, ou colectivos, cunha aportación de 3.000 €, 2.000 € ou 1.000 €. O premio complétase cunha escultura ou obxecto conmemorativo realizado por artistas ourensáns de recoñecido prestixio, así como un diploma acreditativo

A maiores, establecece un premio por cada unha das catro provincias galegas facéndose expresa referencia a cal delas corresponde cada gañador. Tamén recibirán escultura e diploma e terá unha dotación económica de 1.000 €.

O xurado concederá un premio especial, neste caso consistente na escultura e diploma, á iniciativa cultural desenvolta fora de Galicia, que este xurado considere merecedora desta distinción por axustarse o espírito da mesma, tendo en conta o sentido máis amplo deste premio. Para este apartado pediránselle tres proposta a Federación Estatal de Asociacións de Gestores (FEAGC) sobre as que o xurado tomará a súa decisión.

Polo tanto, a contía máxima do “VII Premio Rodolfo Prada á xestión cultural” será de 10.000,00 € con cargo á aplicación orzamentaria 334.20/481.07.

Na documentación, publicidade ou calquera difusión dos proxectos gañadores farase constar de forma clara que foi merecedor do “VII Premio Rodolfo Prada á xestión cultural 2024”.

O premio poderase declarar deserto en todas ou nalgunha das modalidades, de non existiren candidatos de calidade adecuada, a xuízo do xurado.

Artigo 3) Candidaturas

1. Poderán optar ao premio as persoas, proxectos ou colectivos, tanto profesionais como afeccionados ou entidades que se distingan pola súa traxectoria relacionada co obxecto destes premios.
2. As candidaturas poderán ser presentadas por persoas físicas, colectivos culturais ou institucións públicas ou privadas do ámbito cultural dentro do prazo sinalado nas

presentes bases.

3. O mesmo xurado, unha vez constituído como tal, tamén poderá formular propostas sobre estes premios.
4. Non serán admitidas candidaturas que xa foran premiadas en edicións anteriores ou teñan unha relación directa con estas.

Artigo 4) Documentación e prazo de presentación

1. As candidaturas deberán ser presentadas a través do formulario normalizado que acompaña estas bases. As solicitudes, subscritas polo interesado irán dirixidas á Presidencia da Deputación Provincial, e poderán presentarse en calquera dos lugares previstos no artigo 16.4 da Lei 39/2015, do 1 de outubro, do procedemento administrativo común das administracións públicas.
2. O formulario de presentación da candidatura ao premio deberá ir acompañado dunha breve memoria de non máis de 5 folios, nos que se recollan, literal e graficamente, os méritos xustificativos da presentación da candidatura, así como aqueles enlaces a redes onde se poida obter un coñecemento mais preciso da iniciativa.
3. O prazo de presentación de candidaturas rematará o 05 de abril de 2024.

Artigo 5

1. O xurado, intentando garantir a paridade entre homes e mulleres, estará formado por 9 membros de acordo coa seguinte composición:
 - a) Presidente: O Presidente da Deputación Provincial de Ourense ou persoa na que este delegue.
 - b) Vogais:
 - 1 representante da Deputación Provincial de Ourense
 - 1 representante da Secretaría Xeral de Cultura
 - 4 profesionais de recoñecido prestixio no ámbito da xestión cultural designados pola Deputación Provincial de Ourense
 - 1 representante da Asociación Galega de Profesionais da Xestión Cultural (AGPXC)
 - 1 representante da Asociación Cultural Rodolfo Prada, dos Peares
 - c) Secretario: Actuará como secretario (con voz, pero sen voto) un responsable da Área de Cultura da Deputación Provincial de Ourense.

Artigo 6) Resolución

1. O prazo máximo para resolver e notificar a resolución do premio non excederá do día 19 de abril do 2024, unha vez o xurado teña tempo suficiente de analizar as diferentes candidaturas presentadas.
2. A decisión do xurado en que se resolva a concesión dos premios farase pública a través dos medios de comunicación e da web da Deputación Provincial de Ourense.

Artigo 7) Entrega dos premios

Os premios entregaranse no transcurso dun acto institucional presidido polo presidente da Deputación Provincial de Ourense, entidade organizadora destes premios e que se fará público oportunamente.

2º.- Ordenar a publicación do acordo de aprobación das referidas bases e convocatoria no BOP, para xeral coñecemento.

5.- ASUNTOS DE URXENCIA.- Non se suscitaron.

6.- COMUNICACIÓNS DA PRESIDENCIA.- Non se presentaron.

7.- ROGOS E PREGUNTAS.- Non se formularon.

E, ás dez horas do referenciado día cinco de febreiro do ano dous mil vinte e catro, a Presidencia dá por rematada a sesión da Xunta de Goberno, e redáctase esta acta, que se asinará electronicamente.